

## Headlines

- 1 चुनाव आयोग आस्सेआ सी-विजील ऐप राएं चुनाव प्रक्रिया उप्पर नेड़मी तक्क रक्खी जा'रदी ऐ।
- 2 चुनाव आयोग नै सब्बनें राज्यें ते केन्द्र शासत प्रदेशें दे मुख्ख चुनाव अधिकारिएं गी गर्मिएं गी दिक्खदे होई सब्बे इंतजाम करने लेई आक्खेआ।
- 3 विदेश मंत्री डॉ. एस.जयशंकर होरें आक्खेआ जे अपनी राश्ट्री संप्रभुता गी बरकरार रखने आस्तै भारत फिलिपींस दा समर्थन करदा ऐ।
- 4 संयुक्त राश्ट्र दे महिला सम्मेलन च भारत नै वैश्विक स्तर उप्पर बरोबरी आले प्रयासं गी निजि ते सार्वजनिक खेत्तरें च अग्वे बधाने दे महत्व उप्पर लोह पाई।

<><><><><><>

## EC-C.Vigil App

चुनां आयोग आस्सेआ सी-विजील ऐप राएं चुनाव प्रक्रिया उप्पर नेड़मी तक्क रक्खी जा'रदी ऐं इस ऐप राएं आदर्श आचार संहिता दी खलाफवर्जी दी रिकार्डिंग ते रिपोर्टिंग करियै फोटो खिच्चियै जां वीडियो दे राएं ऑनलाइन शकैत दर्ज कराई जाई सकदी ऐ। चुनाव आयोग दी एह ऐप लोकें दे हत्थें च चुनाव आचार संहिता सरबंधी खलाफवर्जिएं बारे जानकारी देने दा इक असरदार थेआर साबत होआ'रदी ऐ। आदर्श आचार संहिता दी खलाफवर्जिएं ते खर्चे दी बेजाब्तगिएं बारे बी इस ऐप दे जरियै नागरिक रिपोर्ट करी सकदे न। मुख्ख चुनाव कमीशनर राजीव कुमार होरें आक्खेआ ऐ जे सी-विजील ऐप नागरिकें गी सौ मिंटें दे अंदर-अंदर खलाफवर्जी उप्पर कारवाई करने दा भरोसा दुआंदी ऐ। इसी चलाना बी आसान ऐ, जेह्डी जिला कंट्रोल रूम, रिटर्निंग अफसर ते पुलसै दे फ्लाइंग स्काड आले दस्तें कन्नै नागरिकें गी जोड़दी ऐ। एहदे इलावा लोक सियासी तौर उप्पर होए दे माड़े बर्ताव दी शकैत बी फौरन दर्ज कराई सकदे न। जियां गै ऐप उप्पर कोइ शकैत भेजी जाग, शकैतकर्ता गी इक खास शनाख्ती पंछान हासल कराई जाग, जेह्दी सहायता कन्नै ओह अपने मोबाइल फोन उप्पर शकैत दी पेशरपत दिक्खी सकदा ऐ।

<><><><><><>

## EC Advisory

भारतीय चुनाव आयोग नै सब्बनें राज्यें ते केन्द्र शासत प्रदेशें दे मुख्ख चुनाव अफसरें गी चुनाव दरान गर्मी ते लूह दी चुनौती कन्नै निबड़ने बारे दिशा-निर्देश जारी कीते न। जिंदे च आक्खेआ गेदा ऐ जे मैहकमा मौसम नै ऐकती सोए दरान सामान्य कोला मती गर्मी पौने दे आसार दस्से दे न जेह्दे चलदे मार्च कोला लेइयै जून दरान भारी गर्मी ते लूह दी स्थिति पैदा होई सकदी ऐ। आयोग नै इस सिलसिले च गर्मी दे प्रकोप कोला कैहर बचाह लेई राश्ट्रीय आपदा प्रबंधन प्राधिकरण दी तरफा जारी "केह करचे केह नेई करचे" सरबंधी सलाह दियां कापियां सांझियां कीतियां न। राश्ट्रीय आपदा प्रबंधन प्राधिकरण आस्सेआ जारी सलाह मूजब लोकें गी धुप्पै बाहर निकलने कोला बचने लेई आक्खेआ गेदा ऐ, टकोहदा करियै दपैहरी 12 बजे कोला लेइयै 3 बजे बश्कार। लोकें गी सलाह दित्ती गेदी ऐ जे ओह खूब पानी पीन ते ब्हेई रूट्टी नेई खान। आयोग नै सब्बने मुख्ख चुनाव अफसरें गी आक्खेआ ऐ जे ओह सब्बने मतदान केन्द्रें पर पीने आले पानी दी पूरी बवस्था रखन, छां दा प्रबंध करी रखन तां जे मतदाताएं गी लम्मे चिरै तोड़ी धुप्पै च नेई खड़ोना पवै। इंदे इलावा मतदान केन्द्रें पर सब्बे जरूरी बुनियादी सेवां बी लाजमी तौरा पर उपलब्ध होनियां लोड़चदियां।

<><><><><><>

### DEO-Jammu(byte)

जम्मू दे डिप्टी कमीशनर सचिन कुमार वैश्य होरें जेहड़े जम्मू संसदी हल्के दे रिअनिंग अफसर बी हैन, उनें अज्ज वर्चुअल ढंगे राए सांबा, रियासी ते राजौरी जिलें दे जिला चुनां अफसरें ते असिस्टेंट रिअनिंग अफसरें कन्नै मीटिंग दी अध्यक्षता कीती। उनें आक्खेआ.....बाईट

<><><><><><>

### DEO Doda(byte)

डोडा दे जिला चुनां अधिकारी हरविंदर सिंह होरें डोडा पच्छम ते भद्रवाह चुनां हल्के आस्ते ईवीएम मशीनां भेजियां, इस मौके उनें आक्खेआ.....बाईट

<><><><><><>

### Sarrori Nomination(byte)

डैमोक्रेटिक प्रोग्रेसिव अजाद पार्टी दे मेदवार गुलाम मोहम्मद सरूरी होरें अज्ज रिटनिंग अफसर डॉ. राकेश मिन्हास हुंदे दफतरै च उधमपुर लोकसभा सीट लेई अपना नामांकन जमा करोआया। इस मौके उंदे कन्नै साबका मुखमन्त्री गुलाम नबी आजाद बी मजूद हे। नामांकन दाखल कराने दे बाद सरूरी होरें आक्खेआ जे साढी पार्टी बाद्धे विकास दे नां पर चुनां लडै करदी ऐ की जे पिछली सरकारै लोकें दिए जरूरतें मूजब कम्म नेई कीते। उनें आक्खेआ.....बाईट

<><><><><><>

### Sveep-Reasi(byte)

रियासी दे जिला चुनां अफसर विशेष पॉल महाजन हुंदे निर्देशें मताबक, उत्थूं दे स्वीप लेस्स आस्सेआ मिनी सचिवालय च इक व्यापक जागरूकता कार्यक्रम दा सरिस्ता कीता गेआ। इस कार्यक्रम दे आयोजन दा मकसद लोकतांत्रिक बवस्था च वोट दे महत्व गी समझांदे होई बक्ख-बक्ख मैहकमें दे मलाजमें सनें हर इक नागरिक गी वोट पाने दे अधिकार दा इस्तेमाल करने लेई प्रेरत करना हा.....बाईट

<><><><><><>

### Jaishankar Philippines

विदेश मंत्री डॉ. एस.जयशंकर होरें आक्खेआ ऐ जे अपनी राष्ट्री सम्प्रभुता बरकरार रखने दे फिलीपींस दे जतनें दा, भारत पूरा-पूरा समर्थन करदा ऐ। अज्ज मनीला च अज्ज फिलिपींस दे विदेश मंत्री एनरिक मेनालो हुंदे कन्नै मीडिया गी संबोधत करदे होई उनें आक्खेआ जे हर इक मुख गी अपनी राष्ट्रीय सम्प्रभुता बनाई रखने ते उसी लागू करने दा अधिकार ऐ। विदेश मंत्री हुंदा एह ब्यानद क्खनी चीन सागर च चीन कन्नै फिलिपींस दे समुंद्री विवाद दी पछोकडै च आया ऐ। डॉ. जयशंकर होरें आक्खेआ जे भारत आसियान मुख्खे दी केंद्रीता, एकता ते आपसी तालमेल दा हिमायती ऐ। उनें इब्बी आक्खेआ जे भारत गी नियमें पर आधारित शासन दी तगड़ी पालमा करने कन्नै इस क्षेत्र च बेह्तरीन तरक्की ते समृद्धि पर भरोसा ऐ। विदेश मंत्री होरें आक्खेआ जे इस मामले च समुंद्री संविधान दे तौरा पर मानता हासल समुंद्री कनूनें दे सरबंधे च संयुक्त राष्ट्र दी 1982 आली घोषणा टकोहदा महत्व रखदी ऐ ते सब्बने पक्खें गी पूरी चाल्ली इंदी पालमा करनी लोडचदी। उनें आक्खेआ जे दुनिया भरै च आवा करदे बदलावै गी ध्यानै च रखदे होई एह हार बी मता जरूरी होई गेदा ऐ जे भारत ते फिलिपींस इक दुए कन्नै होर मते नेडे होइयै कम्म करन तां जे चुनौतिएं दा बेहतर ढंगे नै मकाबला कीता जाई सकै ते उभरदी कुल संसारी बवस्था गी शकल दित्ती जाई सकै।

<><><><><><>

### UN-CSW

भारत नै संयुक्त राष्ट्र च महिलाएं दी स्थिति उप्पर आयोजित 68में सलाना सम्मेलन च वैश्विक स्तर उप्पर बरोबरी आले प्रयासें गी निजि ते सार्वजनिक खेत्तरें च अगुँ बधाने दे महत्व उप्पर लोह पाई। न्यूयार्क च 11 थमां 22 मार्च तककर लागे दे इस सम्मेलन च संयुक्त राष्ट्र च भारत दे स्थाई मिशन नै आक्खेआ जे भारत लिंग समानता ते महिलाएं दे सशक्तिकरण दी वकालत करदा ऐ।

<><><><><><>

## J&K-UT Profile

केन्द्र शासक प्रदेश जम्मू कश्मीर च कुल 5 पालीयामानी हल्के न। इंदे चा दो जम्मू डवीजन च ते त्रै कश्मीर डवीजन च न। जम्मू च इक जम्मू ते इक उधमपुर दा हल्का शामिल ऐ। जम्मू कश्मीर दे कुल 20एं जिलें चा 8 जिले जम्मू डवीजन दे न। पूरे भारतच उधमपुर पालीयामानी हल्के दा पिछले 9 बरे च शानदार विकास होआ ऐ। डवीजन दे बाकी जिलें च कठुआ, उधमपुर, डोडा, किशतवाड़ ते रामबन शामिल ऐ। आकाशवाणी संवाददाता मूजब इंदे च आबादी दे स्हाबै उधमपुर दी आबादी 24 लक्ख थमां बद्ध ऐ, जिंदे च कुल मतदाता 16 लक्ख 74 ज्हार 277 न। इंदे च 8 लक्ख 26 ज्हार 218 मर्द मतदाता ते 8 लक्ख 48 ज्हार 59 महिला मतदाता न। 18 असेंबली हल्के च कुल 2 ज्हार 637 मतदान केन्द्र न। नामांकन पत्र भरने दी खीरी तरीक कल यानि 27 मार्च ऐ। कागजें-पत्रें दी जांच 28 मार्च गीते नामांकन वापस लैने दी तरीक 30 मार्च ऐ। हुनै तोड़ी 6 मेदवारें उधमपुर लोकसभा हल्के थमां अपने नामांकन भरे न जिंदे च बीजेपी दे डॉ. जितेन्द्र सिंह ते प्रेम नाथ, बहुजन समाज पार्टी दे अमित कुमार ते तिलक राज ते स्वर्ण वीर सिंह जराल, नै आजाद मेदवार ते गुलाम मोहम्मद सरूरी नै डैमोक्रेटिक प्रोग्रेसिव आजाद पार्टी दे मेदवार दे तौर उप्पर अपने नां दर्ज कराए न।

<><><><><><>

## DEO-Poonch

आँदे लोकसभा चुनाएं च पूरी चाल्ली पारदर्शता बनाई रखने लेई जिला सतह पर चुनां अधिकारी लोडचदे सबै प्रबंध करा करदे न। पुंछ च चुनां प्रक्रिया गी पूरी चाल्ली व्यवस्थित ते सुरक्षित ढंगै नै तोड़ चाढ़ने लेई बक्ख-बक्ख टीमां तैआर कीतियां गेदियां न जिंदे च फ्लाइंग स्क्वाड, खर्चे अखराजाते पर तक्क रखने आलियां टीमां ते नोडल अफसर बी चुनाएं दी गरिमा बनाई रखने लेई कम्म करा करदे न। इस बारे आकाशवाणी जम्मू कन्नै गल्ल करदे होई जिला चुनां अफसर यासीन मोहम्मद चौधरी होरें आक्खेआ.....बाईट

<><><><><><>

## BJP.LS Candidates

आँदे लोकसभा चुनाएं लेई भारतीय जनता पार्टी नै चऊं होर मेदवारें दे नाएं दा ऐलान करी दित्ता ऐ। राजस्थान च कनैहिया लाल मीणा गी दौसा लोकसभा सीट ते इंदू देवी जाटव गी करौली-घोलपुर लोकसभा सीट लेई बीजेपी मेदवार दे रूपै च चुनां मदाद च तोआरेआ गेआ ऐ। तोआई मणिपुर संसदीय हल्के थमां थौउनाजम बसंता कुतार सिंह बीजेपी दे मेदवार होंगन।

<><><><><><>

## Srilanka-President

श्रीलंका दे राष्ट्रपति रानिल विक्रमासिंघे होरें कोलम्बो च आयोजित डिजीटल पब्लिक इनफ्रास्ट्रक्चर सम्मेलन च बोलदे होई आक्खेआ जे भारत औने आले बरे च विकास दा केन्द्र बनोग ते डिजीटल पब्लिक इनफ्रास्ट्रक्चर दे खेत्तर च भारत आस्सेआ कीते गेदे विकास कम्म श्रीलंका आस्तै फायदेमंद साबत होंगन। सिंघे होरें आक्खेआ जे मजूदा हालात गी दिक्खदे होई श्रीलंका गी डीपीआई दे खेत्तर च सहायता उपलब्ध कराने आस्तै भारत सारे कोला शैल देश ऐ। उनें अगुै आक्खेआ जे प्रधानमंत्री हुंदे पिदले बरे दे श्रीलंका दे दौरे दरान उंदे कन्नै श्रीलंका गी दरपेश चुनौतिएं ते मौके बारे बी चर्चा होई ही। इस दरान डिजीटल पब्लिक इनफ्रास्ट्रक्चर दे तत्वे गी दपक्खी सरबंधें च शामिल करने दा फैसला कीता गेआ हा। सैमीनार च भारत दी सहायता कन्नै डीपीआई दे कन्नै होर दूए वैश्विक ते खेत्तरी अनुभवे गी सांझा करदे होई मुख्य ध्यान उनें उपाएं ते जरियें उप्पर केन्द्रित कीता गेआ, जिंदे राएं श्रीलंका दा विकास होई सकदा ऐ।

<><><><><><>